



Advertisement X

Panglima 8 Briged Jeneral, Datuk Azmy Yahya (dua dari kanan) bersama anggotanya membantu mangsa banjir di Kampung Sungai Ular, Pengkalan Kubor berpindah semalam.

KOTA BHARU – Keadaan banjir di Kelantan menunjukkan perkembangan positif apabila bilangan mangsa banjir menurun kepada 18,570 orang semalam berbanding 20,629 kelmarin.

Menurut portal rasmi banjir kerajaan negeri, daerah yang terjejas juga berkurangan dari lapan daerah kelmarin kepada tujuh daerah.

Sebanyak 65 pusat pemindahan terus dibuka sehingga 7 malam semalam berbanding 83 pusat pemindahan kelmarin.

Cuaca hujan yang tidak begitu kerap menyumbang kepada senario positif itu.

Daerah Pasir Mas masih merupakan daerah yang paling terjejas apabila 11,408 mangsa ditempatkan di 39 pusat pemindahan.

Portal berkenaan turut melaporkan, Sungai Golok di Rantau Panjang masih di paras bahaya iaitu mencecah 10.35 meter.